


## Mighty Talent mester ta fuertisimo



ORANJESTAD(AAN)Awe noch den Concurso di Calypso, Mighty Talent cu tin corona pa defende, lo mester ta hopi fuerte pa por ripiti y bay cu e corona un biaha mas. E rival mas fuerte cu e lo tin awe noch lo ta Quick Silver cu su "Thanks for the memories" cu ta vislumbra como e calypso cu mester wordo gana.

Masha popular tabata Lord Cachete cu su "Caramba" cu toque mexicano, mientras cu Singing Olivia, cu ta e unico cantante femenino entre e finalistanan, a aparece cu

miras riba e corona e prome anochi cu su interpretacion di "Sexual Harrasment".

Esun cu posibilidad grandi tambe di por sorprende Talent y Quick Silver awe noch ta Mighty Hippy cu a logra exito grandi cu "City Inspector" y pa awe noch lo ta entre e favoritonan.

Fuera di e cantantenan aki, e sorpresa lo por cay di Captain Hook di NBO y di Mighty Jaoul cu su "General Topics", mientras cu Prins Freddy cu Lord Kashi ta keda riba e lista pa por ta batcazo di calypso e aña aki.

## Hylianne Croes Reina Infantil '99

ORANJESTAD(AAN): Ayera anochi e candidata di Santa Cruz, reinasita di Dream Team, Hylianne Croes a logra hiba e corona infantil Santa Cruz un biaha mas, despues cu el a wordo eligi y corona Reina Infantil di Carnaval 45, 1999.

Mester menciona cu a keda demostra ayera anochi tambe cu simpleza por ta mes bunita cu luhoso, mirando con varios di e candidatanan a presenta shownan di menos luho cu den añanan anterior, sinembargo cu a resulta den un luho admirable ya cu e temanan tabata tur cos pa duna realce na e show.

No solamente e publica den Elias Mansur Ballpark pero tambe esnan cu a sigui e eleccion via television por a mira un show precioso.

E candidata di Kids of Fame, Patsy Dania tabata e candidata cu a gana pa best show cu su presentacion di Fiesta na Parke Arikok, y ademas el a resulta runnerup.



Di dos runnerup tabata Louella Julien Wever, representando Chaz Models, di tres runnerup tabata Melody

Hernandez di Savaneta, y di cuatro runnerup a resulta candidata di Oranjestad Jurienne Tromp.

## Cambionan grandi den fraccion di AVP den Staten

ORANJESTAD(AAN):--- Ayera noch den Cas di Partido na Playa a tuma lugar un reunion di Consejo di Partido di AVP den cual a tuma varios desicion importante tocante di constelacion di e fraccion di AVP den Staten y di fortifica ehecurion di e programa di partido y di gobernacion.

Segun informacion ricibi di e partido, e cambionan den fraccion di AVP ta cuadra cu loke e partido mes a declara

algun luna pasa y cu e lider di AVP, Promer Minister Henny Eman a declara den e programa di 'Mesa Rondo' y den entrevistanan riba e futuro di e partido.

E cambionan ta cu e veterano di AVP e miembro di parlamento Otti Oliveira ta tuma su retiro y den su lugar ta drenta e candidato di AVP di hopi aña, sr. Willie Willems. E otro cambio den fraccion di AVP den Staten ta cu sr. Gaby Werleman ta retira a

peticion di su partido pa asumi e responsabilidad pa e proyecto 'Aruba limpi y Bunita' y asuntonan di SER-LIMAR cu mester haya un empuhe grandi atrobe. Den su lugar srta. Carmelita Haynes ta drenta Staten tambe pa prome biaha.

Awe mainta e partido AVP ta tene un rueda di prensa pa 10:00 or na Cas di Partido na Playa, pa presenta e cambionan aki na comunidad.

## Prome Ministro a kibra Orden di Polis atrobe

ORANJESTAD(AAN):Dos aña pasa na Palo Marga, Prome Ministro a duna orden pa sigui cu concurso di Calypso y Roadmarch, a pesar cu polis a para e concurso cumpliendo cu nan orden. Algun luna pasa durante e desgracia na Raddison cu polis a detene un di e personanan ilegal, prome ministro a duna orden pa laga e persona bay. Ayera anochi cu polis a para e eleccion infantil di carnaval pasobra a yega 10 or manera

tabata e palabracion y no a cumpli pa termina e show, a ripiti e orden na polis.

Despues di discusionnan entre polis y miembronan di directiva di SAC y cu contacto a ser tuma cu comisario di polis y despues tambe cu Prome Ministro, prome ministro a duna orden pa laga e show sigui.

DIARIO tambe a haya contratempo ayera y no por a presenta tur e candidatanan durante nan prome presentacion

awe, como cu president di SAC a stop fotografo di DIARIO di saca portret unda e tabata, siendo cu despues e mes lugar a wordo ocupa y ningun hende a kiek.

Pa bienestar di e muchanan y familia cu a haci gastonan grandi, DIARIO a sigui cubri, pero si no bin solucion pa e asunto di sacamento di portret pa siguiente eleccion y actividadnan, no ta keda DIARIO nada otro cu para tur promocion di Carnaval e aña aki.